

Doch nich ekj

(Yet Not I)

1. Woo groot de Jnod en Jesus, mien Erleesa,
Nuscht bätret waut de Himmel jäwen kaun.
Hee's miene Freid, Jerajchtichkeit un Frieheit,
Ne sechre Leew, mien onbejrensten Fräd.
Dit hool ekj faust: hee's miene eensje Hopninj.
Aul mien Läwen, es jebung'n aun sient.
O waut dit doch bediet, ekj kaun sinj'n "aules mient,"
Doch nich ekj, daut's derch Christus en mie.
2. En diestre Nacht, woat hee mie nich veloten,
Bie miene Sied, blift Jesus gaunz dich bie.
Ekj oabeid noch, en Schwakheit uk met Freiden,
En miene Noot, schauft siene Krauft en mie.
Dit hool ekj faust: mien Hoad woat mie bewoaren,
Derch dön deepsten Tol, doa leit hee mie;
O de Nacht es vegon'n, un ekj woa äwakom'n,
Doch nich ekj, daut's derch Christus en mie.
3. Ekj fercht mie nich, ekj weet ekj hab Vejäwunk,
De Tookumft secha, hee betold dön Pries,
Wiels Jesus blad, un storf om mie to raden,
Dan stunt hee opp, daut Grauf haft hee besiecht.
Dit hool ekj faust: de Sind deed hee betolen,
Jesus, nu un emma steit mie bie.
Loos von Kjäden ekj sie, ekj kaun sinj'n "ekj sie frie!"
Doch nich ekj, daut's derch Christus en mie.
4. Vom gaunzen Hoat, well ekj mien Jesus folgen,
Hee brinjt mie Heim, hee sajcht dit woat hee doon'n.
Un Dach fa Dach, woat hee de Krauft mie jäwen,
Bat ekj woa ston'n, met Freiden ver sien Troon.
Dit hool ekj faust: hee's miene eensje Hopninj!
Aule lea fa emma am jehieet!
Wan de Rees es vebie, dan noch saj ekj gaunz frie,
Doch nich ekj, bloos derch Christus en mie.

Wieed un Musikj: City Alight

Plautdietsch: Nettie un Diedrich Friesen, Johnny Loewen, 2023